

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HADHRAT MUHYI-UD-DIN AL-KHALIFATULLAH
Munir Ahmad Azim

31 Juillet 2015 ~
(14 Shawwal 1436 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba lors:

DÉVOTION ET SOUMISSION À ALLAH

Ki sanla ene *Momin* (musulman)? Couma pou faire pou vine ene bon musulman? Sa c'est bane questions ki Allah fine réponde dans plusieurs bane versets Quran et bane Hadiths de Rassulullah (saws). Allah dire dans Quran:

La dévotion c'est pas seulement ki ou tourne ou figure vers soleil levé ou vers soleil couché, mais vrai dévotion, c'est kan kikaine accepter Allah, le dernier jour, bane anges, le livre et bane prophètes, kan par amour pour Allah, li partage so dibien avec so bane parents, bane orphelins, bane poves, bane voyageurs, bane mendiants et bane esclaves. Li bizin aussi pratique la prière (*Salat/Namaz*), donne Zakaat (taxe obligatoire), complète bane engagements ki li faire, supporter dans la peine, dans malheur et dans bane moments difficiles. Sa bane là, zot bane ki vive dans la vérité et zot bane *Muttaquun* (bane ki craindre Allah et vive dans chemin Allah). (Al-Baqara 2: 178)

La dévotion ki vine du cœur et ki ene instrument nécessaire pour gagne vraie *Taqwa* (piété) li trouve dans obéir Allah dans tous So bane commandements ki Li fine établir pour So bane serviteurs et servantes lors la terre. Ki li missiés ou madames, jeunes ou vieux, zot tous ena bane devoirs envers Allah, ki zot bizin respecter afin ki zot vine bane vraies serviteurs d'Allah, bane vraie dimounes ki ena la foi, ki sincère dans sa la foi là et ki soumette zot complètement à la volonté d'Allah.

Le Saint Prophète Hazrat Muhammad (saws) fine dire : « *Couma merveilleux situation d'ene croyant, parski tous so bane travaux/zaffaires bon. Si ene bon zaffaire arrive li, li rende grâce (reconnaissant) pou sa ; si ene mauvais zaffaire arrive li, li supporte sa avec patience, et sa (en vérité) bon pour li. Sa pas applique pou aucaine les autres dimounes excepté pour ene croyant !* » (Muslim)

Mais mo bizin mentionné aussi ki ena bane grades dans qualités de bane croyants, couma Hazrat Muhammad (saws) faire nous compran : « *Ene croyant ferme li pli meilleur et pli cher à Allah ki ene croyant ki faible (dans so la foi).* » (Muslim)

Malgré ki ene croyant reste ene croyant parski li fine amène *Imaan* dans Allah et dans tous saki Li fine prescrire, mais pas tous croyants réussi établir à cent pourcent tous saki Allah fine ordonne li pou fer. Ena ki arriver li glisser dans so croyance, kot capave li croire li pé faire ene bien, kan en vrai dire sa pas pé fer Allah plaisir ditout. Ena ki faire bane actions en partie pou lizié d'Allah et en partie pou lizié dimounes, kot action là finalement vine invalide (li annulé) à cause sa manquement ki fine ena dans faire sa bon action là.

En vérité, ene dimoune, surtout ene dimoune ki li dire ki li ene musulman, ki dire ki li croire dans Allah et dans tous saki Allah fine dire ki li bizin croire (c'est-à-dire, croire dans Allah, anges, prophètes, livres saints, destin et bane récompenses ou punitions de lotte les mondes) pas pou capave arrive à nannié si li pas soumette li à la volonté d'Allah. La dévotion ki li dire ki li ena, alle dans vide, si li pas suivre sa avec ene sincérité du cœur. So croyance ki li dire li ena, bizin pas zis lors la lèvres mais aussi en pratique kot li établir so **Islam** (soumission à Allah) en pratiquant tous saki Allah fine dire li faire ; sa aussi, non pas pou montrer lizié dimounes mais seulement pour le plaisir d'Allah et pou gagne So pitié et satisfaction.

Allah fine établir dans Quran et à travers l'exemple de So plus grand prophète, Hazrat Muhammad (saws) couma pou établir et pratique *Salat* ki pou faire Allah content avec sa bane kalités *Namaz* là et accorde à So bane serviteurs dévoués zot bane requêtes (*duahs*) ki zot faire dans zot la prière (*Salat*). *Salat* et bane positions dans *Salat* fine établir par Allah pou ki l'homme reconnaite so infériorité devant suprémacie de so Créateur, ki sans Allah li pas ti pou même exister et conne sa le monde kot li fine né là : la Terre. Allah fine créer dimounes avec la terre et fine donne li ene telle place pou rester ki pou fer li maziné ki ene jour na pas ene jour li pou bizin retourne vers Allah et révine la terre couma sa la terre lors quoi li ti pé habituer marcher et ki li, sois ti pé cherche faveurs Allah ou sois li ti pé perdi so létemps dans l'amizeman.

Certainement pas tous dimounes ki réalise bane bienfaits d'Allah lors zot. Ena ki pas reconnaissants ditou et zot attache zot avec le monde matériel tandis ki bane vrais *Muminoun* (croyants), c'est bane ki toujours garde à l'esprit ki ene jour na pas ene jour zot pou bizin retourne vers zot *Rab* (Allah) et zot faire tous saki en zot pouvoir et capacité pou pas dépasse bane limites ki Allah fine établir pou zot afin ki zot passe zot bane l'examen lors sa le monde là. Et en plus de sa, zot veille avec précaution pou mette en pratique tous bane commandements d'Allah et dans limites ki Li fine prescrire. Et zot la foi dans tout saki Allah fine rende sacré pou zot comme musulmans li reste solide ziska ki zot trouve la mort. Zot vivre dans la foi et zot gagne ene la vie spirituelle ki garanti zot la vie éternelle dans contentement Allah lors zot.

Pour sa, zot bane dimounes ki, c'est Allah ki juge zot comme bane dimounes ki ena *Imaan* (la foi). Zot par zot-mêmes zot pas capave dire ki zot ena la foi parski zot conné ki c'est seulement Allah ki conne mesure exacte de zot la foi, et ki sa patente juge la foi de bane dimounes li réserver seulement à Allah. Mais d'après guidance ki Allah et So Rassool (saws) fine donné dans Quran et Hadiths, zot

comme bane directives couma pou améiore zot la foi, et fer li sorti de l'état faible et incertain et vine ferme et solide. Sa bane là, zot alle de stage en stage ziska ki Allah satisfait et content avec zot. Zot ena sa l'envie là en zot pou plaire à Allah arrive séki arrive et même si le monde contre zot, mais pour zot, pourvu Allah avec zot, parski c'est pas dimounes ki pou juge zot, mais c'est bien Allah (twa) ki pou juge zot. Alors sa pensée là donne ene réconfort extraordinaire à zot lécoeur kot zot senti zot léger, kot ene *Sakina* (tranquillité) raffermi zot lécoeur et fer tout tracas disparaite. C'est sa bane kalité croyants là ki pou réussi et ki Allah fine promette dans Quran :

« Allah fine promette bane parmi ou ki ena la foi et ki faire le bien, ki Li pou place zot lors la terre comme So gérants, couma Li ti faire avec bane ki ti vine avant zot ; et ki Li va renforci zot religion ki Li fine content donne zot, et ki Li va transforme zot crainte en sécurité. *'Zot adore Moi et pas associé nannié avec Moi.'* Bane ki refuse gagne la foi après sa, zot vraiment suivre chemin travers. »
(An-Noor 24 : 56)

Nous bizin fer duaHS ki Allah juge nous comme bon, parski sans So grâce et So pitié, nous ene nannié ditout. Ena malheureusement bane ki déclarer ki zot fine gagne patente la foi, pou juge la foi de bane dimounes. L'histoire se répète ziska dans nous l'époque kot bane dimounes ki dire zot même meilleur musulmans ki fine accepter tous prophètes et réformateurs et aussi le Messie Promis Hazrat Mirza Ghulam Ahmad (as), mais malheureusement kan Allah fine élève encore ene So Messie parmi zot pou récite So bane révélations et montrer So bane signes avec zot, zot gonfler avec l'orgueil et zot cherche attache zot plisse avec zot chaise l'autorité mondaine pou ki dimounes contigner lève zot en l'air, en l'air.

Sa bane kalités dimounes et chefs là prend zot comme bane messagers d'Allah sans ki toutefois Allah fine donne zot l'instruction pou deboute et proclamer (pareil couma tous So bane messagers ti fer) ki zot vine de Li. Dimounes fine élu zot mais seulement zot laisse dimounes pensé ki « La voix du peuple, c'est la voix de Dieu ». Zot fine aveuglé par bane l'autorité et pouvoir mondaine et zot pensé ki si la masse dimounes avec zot, alors zot en sécurité, tandis ki Allah détesté sa, et bientôt si sa bane kalités dimounes là contigné dans mal guide bane dimounes et cachiette la vérité, bane vrais l'enseignements divines de zot, alors c'est sa bane kalités chefs coupables là ki pou bizin paye les consékances devant Allah (twa). Zot consékances pas fine réserver seulement dans Aakhirat, mais lors la terre aussi zot pou souffert ziska ki la vérité de la Manifestation d'Allah lors So vrai Élu (Messenger) vine clair. Et alors pas pou ena aucaine doute dans l'esprit dimounes ki sanlà vrai l'Élu d'Allah : Celui ki élu par Allah et ki le Saint Esprit (*Ruh-il Qouddouss*) fine déssane lors li ou sois celui ki dimounes fine élire li et ki pas ena aucaine pouvoir pou comme bane vérités cachés ki Allah seulement révélé à So bane Élus.

Ki Allah ouvert tous bane lécoeurs assoiffé de So guidance et guide zot pou accepter la vérité après ki zot fine témoigne et reconnaitte li. La vérité pou bizin triompher même si sa pas faire plaisir à bane hypocrites et bane ki cherche rende chemin Allah travers et mal guide bane dimounes. *Insha-Allah, Ameen.*